

## PAKOTIANGA ROURU

Kia tae toku mataiti ki te tai ngauru, kua manakonako toku kopu tangata i te rave i tetai angaanga no te pakotianga i toku rouru. Kare katoa i te angaanga mama, kua na roto i te uipaanga, ki te kopu tangata. Tupu mai ei tetai akonoono anga meitaki e te maru, e anaea e raveia ei te pakotianga rouru, koai te marama eaa te ra e te ora, e ka raveia kiea? I roto katoa i teia tuatau i ikiia ia mai ei tetai vaa tara (MC) no teia pakotianga rouru, naai e mou i te makave rouru, eia makave i te katoatoa. E pera te kai ka raveia no te reira ra. Mei te moa, puaka, puanio, e tetai au kai tuketuke no te akakoro anga o te reira ra. Te tuatau e oora ia ei te au apinga aroa, naai te mea mua e tae uatu ki te tangata openga, ei reira e oronga ia atu ei tetai tuatau no te tamaiti ki oronga mai i tana tara akameitaki anga i te kopu tangata katoatoa tei aere mai no Mangaia mai, Nutireni, Autereria pera te tua Tonga e te tua Tokerau. Ei roto rai i teia uipaanga kua tano rai te tuatau i akanoo ia no te pakoti anga i te rouru, mate akamaara atu i tona ra anau anga, e e reo poroki katoa teia no toku tupuna tane ki toku metua vaine.

Ko toku kopu tangata i te tua o toku metua vaine, metua tane, te kopu tangata mei Mangaia, te tua Tonga, tua Tokerau, Nutireni, Autereria e pera toku au taeake piri mou e pera te au aronga ti pati ia no te pakoti anga i toku rouru. E tetai au tangata tei manakonako no te aere mai i te tauturu, e te au taeake o toku metua vaine. Kua riro katoa ratou i te raverave mai i tetai au tuanga angaanga takake no teia marae. Kua apai me kare kua arataki mai anga i te tamaiti nona te rouru te ka pakoti ia ki tona nooanga tei akanoo ia, te tangata nana e akanmanea te rouru me oti te pakotianga, te tangata katoa nana i atu i toku imene manea. Kua pati katoa ia te orometua na tana tuanga pure i te mea oki ko tetai tuanga puapinga teia e toku i te au mea katoatoa ki te rima o te Atua. Kua riro teia pakoti anga rouru noku ei kite anga naku i toku kopu tangata mei vao ake ia Rarotonga nei, e kua rekareka au, kua mataora toku kopu tangata. Kua tupu katoa te reo poroki o toku tupuna tane kia raveia tetai pakoti anga rouru noku mei teia roa te tu. I roto katoa i teia ra kua motu toku rouru roroa e kua riro mai au e tamaiti manea e te akaperepere ia e toku kopu tangata. E ra rekareka teia e kare e ngaropoina iaku. Kua riro tei tupu me kare tei raveia i teia pakoti anga rouru ei tamou anga naku, i te au takai anga na roto i te au angaanga tei raveia, eaa tei tupu e te vai atura. Mataora tikai toku ngakau, me e teina toku e rouru roroa tona ka kite au e akapeea au, eaa taku ka rave. Kua riro katoa teia ei marama kite karape noku no runga i te parani anga porokaramu no te pakoti rouru. E peu matau ia teia me akatupu ia te rouru o te tama mua i roto i toku me kore toou kopu tangata. Ka raveia tetai angaanga ngao mei toku rai te tu.